



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma : Tir Yimiyim

tiryimiyim@aolima

tir yimiyim

TAPAK 3

Asian Games nung India nunger asayartemi takok tajung angu

NCP shibai tentet aji ajaki jangja lir: Sharad Pawar



VOL. XX NO. 351 (ADOK 351) DIMAPUR TENTONÜ (MONDAY) MONGPUTENI (OCTOBER) 02, 2023 ₹ 5.00

Nagaland sorkari 'Hindu-Hindi Nationalist Agenda' anema ola adoktsüla: TNR

Dimapur, October 1, 2023 (TYO): BJP-i Hindu-Hindi tangatetba nung maparen inyaka aoba nung Prime Minister Narendra Modi-i Deobarnü (October 1) 'Nationwide Cleanliness Drive' ayongzükba ya ka lir ta The Naga Rising (TNR)-i metetdaksüogo.

Khristantem temeshi anogo sensatsüba ya Nagaland nung alirtemmezümgmeshiba inyakym ka lir aser iba ajanga Modi'er sorkar dak temulung malem adoker. India sorkar tetuyuba kübok Deobarnü official sentongtem agir. Tawa tuang Nagaland sorkari Deobarnü

Kohima nung Union Minister ka ajanga "PM Viswakarma Yojana" tenzükba sentong agia liasü, ta TNR-i sangdong ka nung ashi.

BJP sasep nung Hindutva tashitem ajanga Hindu nunger lima ka akümtsü atema maparen inyaker. BJP sorkari jenjang ka nungbo iba tangatetba ulushitsü atema ozüngtem aser policy tem yanglur, ta parnokisa ashi.

2014 küm Modi-BJP sorkar akümiba sülen official documents, ozüngtem aser sorkar policy o sentong ajak Hindi oshi agi amshir. Taküm August ita BJP-i aniba Centre sorkari parliament nung bill asem benokba ajak Hindi agi dang

tenüng agütsü.

Bharatiya Nyaya Sanhita Bill, 2023 ajanga Indian Penal Code, 1860 melen, Bharatiya Nagarik Suraksha Sanhita Bill, 2023 ajanga Criminal Procedure Code, 1898 aser Bharatiya Sakshya Bill, 2023 ajanga Indian Evidence Act, 1872 melen.

Kasaji Prime Minister scheme ajak Hindi oshi agi dang jaa lir aser itemji Pradhan Mantri Suraksha Bima Yojana (PMSBY), Pradhan Mantri Jeevan Jyoti Bima Yojana (PMJJBY), Pradhan Mantri Awas Yojana (PMAY), Pradhan Mantri Fasal Bima Yojana (PMFBY),

PM Yasasvi Yojana, PM SVANidhi Yojana lir, ta TNR-isa metetdaksü.

Nagaland nung cabinet minister tem dena nisung kwikati tawa Nagaland nung tenzükba P M Viswakarma Yojana nung Viswakarma tetezü meteta lir ta bilemer. Hindi oshi anemer masü saka Hindi oshi angazüksüba ta ozüng agi masü saka pei mulung asütsüla. Sorkar ozüngtem aser schemes ajak Hindi agi dang ajaba ya Hindi oshi memeteterem dak ozüng ama inyakba mapa ka lir, ta parnokisa ashi.

"BJP-i aniba sorkari asen

tamangba aser libaliro anema inyakba atema Nagaland sorkari ola adoktsüla. Asenok ajaki meteta aliba oshitem nung official documents zülutsüla anungji Neiphu Rio-i aniba sorkari laws, policies, central schemes mesüra programmes ajak English oshi nung tenüng agütsütsü atema nenshitsüla" ta TNR-i ashi.

Asenoki ola madokba ya Hindutva tashitem agizüker ama züngshitsü anungji politics aser terenlok tenüng amer Hindu sobaliba benshiba lima ka akümtsüba inyakym anema ola adoktsü mapang tongogo, ta The Naga Rising-isa ayongzük.

Manipur nung kaketshir 2 tepsetertem puogo

Imphal/New Delhi, October 1, 2023

(Agencies): Manipur nung taküm July ita kaketshir ana tepsetba ken o dak sendakba nung Central Bureau of Investigation (CBI)-i nisung pezü puogo aser ana sota lir.

Kaketshir ana indang noksa ya taoba hopta social media nung prokshia liasü.

CBI-i apuba nisung pezü ya tebur ana aser tetsür ana lir. Ano Imphal nung tanur tetsür ana sota lir. Nisung pezüji Assam kübok Guwahati-i anir ogo.

Iba ken o atema tai tonglokja alirtemji Paominlun Haokip, Malsawn Haokip, Lhingneichong Baite aser Tinneikhohol nunger ta jangjaogo. Lhingneichong Baite yabo tetsür kaketshir indang medemer liasü ta osang angazüker.

Ano, temulung melemeri bilemertem rongnung nisung kabo Churachandpur nung telungpur ka kinungsü lir.

Manipur Police aser Indian Army külem telok kati Churachandpur nung nisungtem apu.

Parnok apuba sülen idangjisa airport-i anir ao aser idakji CBI telok ka ataa liasü. CBI ketdangsurtemi

taonung 5:45 ako meta parnok Imphal nungi anir ao.

Temulung melemeri bilemertem apuba osang angashiba sülen nisung kar airport leni ao. Iba jagi airport anükertem Central Industrial Security Force (CISF)-i tayimtsü apusoa mao tashi kanga akangakang anük.

"Nisung kati ozüng alema inyakba sülen jenshitsü akok saka ozüng nungi mejenbutsü ta shia aliba ama atalokogo. Parnoki mapa tamajung inyakba atema tasüba temerenshi dena temerenshi tulutiba agütsütsü" ta Manipur Chief Minister N Biren Singh-i metetdaksü.

"Phijam Hemanjit aser Hijam Linthoingambi na pur aoba aser tepseter kar tanü Churachandpur nung apuba osang lemsateper" ta paisa ashi.

Taküm July ita nung samar bushiba kaketshir ana indang noksatem September 26 nü social media nung prokshitsü tenzükba liasü. CBI-i iba ken o atema bushisüngdang tenzükba liasü saka tang tashi kaketshir ana indang mang ano mengutet lir.

International Day of Older Persons 2023 among

Kohima, October 1, 2023

(TYO): International Day of Older Persons 2023 tenüng nung Department of Social Welfare Nagaland ajanga teintet rogo pezü nem sempet agütsüogo.

Kohima nung sentong ka agidang teintet rogo pezü (2 level) aser 2 district level) nem 'Distinguished senior citizens awards' agütsü. Chief secretary J. Alam-i

Hokishe Yeputhomi aser S.P. Ellen Konyak na nem sempettem agütsü. Iba sempet nung kulikaket den Rs. 20,000 senpet agütsür.

Ano, Social Welfare Department secretary Martha R. Ritse-i district (Kohima) level sempet angurtem- Nosato Zao aser Khrielielu-u Pfkha na nem sempet agütsü. Tena shia nem kulikaket ka den Rs. 10,000 senpet agütsü.

2 October
Linüki
Gandhi ji
aser
Shastri ji
na tasoba anogomong nung tetushi agütsür

Mahatma Gandhi ji'er shisatsü ajanga alima ajunga ajungmesogo. Bapu dak nisungtem den sendaktepsü aser parnok pa den sendaktepa alitsü sempet liasü. Iba kasaji tanü asen putiotsü atema tongtipang mapang ka nung Lal Bahadur Shastri ji tasütait lenisüba teti bilemtettsü.

- Narendra Modi

CBC 22201/13/0061/2324

state level awardees- Dr.

Ministry of H&FW nung Joint Secretary Rajiv Manjhi-i state semdang



Dimapur, Mongputeni/Oct. 01 (TYO): Ministry of Health and Family Welfare, Govt. of India nung Joint Secretary aser Ayushman Bhava campaign nung Arunachal Pradesh aser Nagaland indang Nodal Officer, Rajiv Manjhi-i September 30, 2023 nü Nagaland semdanga

liasü. Pai Nagaland semdangba mapang Directorate of Health & Family Welfare nungi ketdangsürtem dener CHC Medziphema, Khuzama SC AB-HWC, Pfuchama AW-HWC semdanga liasü. Joint Secretary Rajiv Manjhi-

isa Deputy Commissioner tem den tang tagidak Ayushman mela, organ donation pledge amala osang agia liasü aser IDSP Hall, DHFW nung department ketdangsürtem den Ayushman Bhav campaign indang asadanga senden ka mena liasü.

Pffice telung nung gari ayutsü memelar

Dimapur, Mongputeni/Oct. 01 (TYO): Office mapang temelaba magie gari anena ayuba aser nisung aita kazüba ajanga office indang ki o jen aser osettsüset raksaba den ano tim masüba mapa inyakba ajiteta office compound telungi gari aita anena ayutsü asoshi taoba

mapang metetdakja liasü, ta Additional Secretary & Ex-Officio Director, Kovi Meyase, NCS ajanga sangdong ka nung ashi. Anungji ano maneni tang nungi tenzüka office mapang atemba sülen office complex nung nisung aita kazüba aser gari anena ayuba khenyongi memelatsü aser aibelener tem tim ketdangsür nemo sang agütsütsü, ta sangdong ajangasa ashi.

Assam Rifles temi Wakching nung nisung ka apu



Dimapur, Mongputeni/Oct. 01 (TYO): Itdangiter tem nungi telungpur senzüsempongba osang angazükba nung ajemdaker Assam Rifles aser Nagaland Police temi September 30, 2023 nü Wakching Chingla nung Mobile Vehicle Check Post (MVCP) amenoka liasü.

Gari aser nisungtem soita meita aoba mapang nisung ka iba tesem nungi jena aotsü merang. Iba nisungba ya pua asüngdangyaba mapang pa ya 2008 nungi tashiyim amshia senotsü meshiba mapa nung yakyaka aliba jangjatet. Iba nisungba ya police nem amoktsüogo.

Nagaland nung Blood Donation Day amung



Kohima, Mongputeni/Oct. 01 (TYO): India linük ajunga den külemi Nagaland nunga October 1, 2023 nü Kohima College, Kohima nung National Voluntary Blood Donation Day munga liasü.

nükjidong rateta jembi aser iba ya ajanga pei sasa azü tenla agütsütsü ajungmesor, ta ashi. Dr. Rhutso-i sentong nung jembidang azü tenlatsü kanga tongtipang lir ta ashi aser kaketshirtem dang shilem agitsü ajungshia liasü.

sangdong aser sen 2000 tashinung printing dak sendakba mapang Imprint team ajanga angati inyaktütsü, ta ashi. Iba sentong nung Joshua Shohe-ia shilem agi aser Keneilesa Neikha, Vice Principal, Kohima College, Kohima ajanga tarur pela agizükba o jembi aser Viserenuo, Assistant Professor, KCK ajanga sentong tenzüka sarasadem aser Executive Member, VBDAK, Burakum Ao-i melepzüng o jembia liasü.

Iba sentong ya Voluntary Blood Donors Association Kohima ajanga Kohima College, Kohima Blood Centre (NHAK), India Red Cross Society (Nagaland Branch), NSBTC aser Government of Nagaland den lungjemer ayongzüka liasü, kong tesemdanger tongti ama MLA Dr. Tseilhoutuo (Ato) Rhutso dena liasü. VBDAK general secretary, Meghraj Lama-i iba anogomung

Tanü sentong nung azü tenlar nem par KOHIMAS hospital nung küm ka tashi kün atema angati temang repringtetsü, ta pai sangdong. Iba den külemi coupon tem lema agütsü, koba ajanga azü tenlar tem ete Coffee, Kohima nung angati coffee (one-time) meshia jemtettsü. Imprint indang Co-Owner, Lelo Mero-ia VBDAK asoshi jenjang balaka atoktsü

Iba sentong nung Joshua Shohe-ia shilem agi aser Keneilesa Neikha, Vice Principal, Kohima College, Kohima ajanga tarur pela agizükba o jembi aser Viserenuo, Assistant Professor, KCK ajanga sentong tenzüka sarasadem aser Executive Member, VBDAK, Burakum Ao-i melepzüng o jembia liasü. Iba sentong nung Sentsiangla, Assistant Professor, Kohima College, Kohima menden liasü, kong nisung 20-i azü tenla agütsü aser nisung 51 blood group tendanga liasü.

Assam Rifles temi state nung sentong balala ayongzüka agi

Dimapur, Mongputeni/Oct. 01 (TYO): Assam Rifles temi October 1, 2023 nü Peren district kübok Peren Town, Pedit village, Heining Kunglwa aser Athibung yimtsüngtem nung mürekmejuba sentongtem ayongzüka liasü. Iba sentong nung GBs aser village council chairmen tem densema yimdaklir nisung 35 dena liasü. Iba sentong nung adener temi lipajen wazüka aser müreka ayutsü mechi süngdong atemba den jana bendangba maparen inyaka liasü. Noklak nunga kasa anogo Assam Rifles temi tesem balala nung mürekmejuba aser awareness agütsüba mapa inyaka liasü. Iba sentong nung civilian 186 aser sepai 63 lungjemer tesem balala müreka jaja aser pei aliba yimtsüng nunga jana-reja meindoktsü nangzüka liasü.

aser Mahatma Gandhi asoba anogomung nungtem nung Assam Rifles temi Kohima district nung mürekmejuba mapa inyaka liasü. Mahatma Gandhi-i India ya temürekba aser tajungba kumdaktsütsü nükla ayuba ama Assam Rifles temi Kohima district kübok tesem balala nung mürekmejuba sentong ayongzüka liasü. Assam Rifles tem den tesem balala nungi volunteers tem lungjemer jana bendana tim tesem nung indokba den mürekmejunga temaba jenjangi ajungkettsü mapa balala inyaka liasü. Wangti village, Mon nung Assam Rifles temi arishi küm 27 tain tebur ka temang anepalua liasü. Iba nisungba ya aremi shikari ao aser tia maka pai bena aliba prangbong agi ka tebi abelen akha. Pa ya Assam Rifles Wangti Camp bushia anir arua RMO, Assam Rifles ajanga anepalua liasü.



September 29-Oct. 01, 2023 anogotem nung Narotekong Baptist Fellowship, Ungma nung asentenshi sentong ka 'Onok Asentenshijang' (T. Ken 80:18) omen nung ajemdaker agiogo. Amongnü tekülem sentong nung Arogotsürtemi ken atendang tangokba noksa nung angur. Telung noksa nung tongti o jembir, Christ Healing Centre Dimapur, Founder & Director, Limawabang Imsong noksa nung angur.

Iba sentong nung yimtsüng temeket mürekba aser kaketshir nem pei aser lokti müreka alitsü indang awareness agüja liasü. Maneni lecture session ka ITC Dan nung ayongzüka kaketshir dang mürekmejuba ajanga nisung takum nung tongtipang shilem agiba, temang, tekolok aser tanüla müreka aliba indang angazükdakja liasü. Nüburtem anema aser pela alitsü lenmang tajungtibaji mürekmejuba ya lir, ta angatetdakja liasü. Linük tesem ajungalen "Swachhata hi Seva" campaign

Iba sentong nung sepai ajak agi 210-i pei aliba tesem aser temeket müreka ano lipajen wazüka ayutsü züngzüktepa liasü.

TMC-i parnok pusemertem Delhi-i anir aotsü atema bus anepalutsü

New Delhi, Mongputeni/October 1 (Agencies): TMC-i Howrah nungi special train ka anepalutsü atema mepeshiba eastern railway ketdangsürtem magizükba sülen parnoki bus 50 anepalutsüogo.

Union sorkari West Bengal nung welfare scheme tem atema senotsü agütsütsü memulungba anema October 2 aser 3 nü linük yimtiba nung longkaka aitba sentong nung shilem agitsü atema Trinamool Congress (TMC) pusemer meyirejang ishika Kolkata nungi Delhi-i apusoago.

TMC aser parnok pusemertemi Mahatma Gandhi National Rural Employment Guarantee Act (MGNREGA), Pradhan Mantri Awas Yojana (PMAY), aser Pradhan Mantri Gram Sadak Yojana (PMGSY) amala scheme balala atema West Bengal nung beneficiaries tem nem senotsü agütsütsü asoshi Centre dang khanga arudar.

TMC kübok inyakertem aser job card bena alirtem aika bus nung mener Delhi-i aotsü.

TMC otongdar Kunal Ghosh-i Honibarnü osangbenertem dang ashiba agi, TMC pusemer 100 dak tema mener aliba jurila tayimtsü-a ka dena Honibar nikongtsütsü thitsüogo.

TMC national general secretary Abhishek Banerjee, shiba lenisüba nung iba longkak aitba sentong agitsü imlar, pai party MP, state minister aser MLA aser tanga lenir tejentem dang October 2 nü Delhi nung alitsü atema mepeshia metetdaksüogo.

"TMC MP aser state minister tem-i October 2 nü Raj Ghat nung yimjung nung mener longkak aitba sentong ka ayongzüka agitsü. October 3 nü

Jantar Mantar nung longkak aittsü. Onoki Delhi nung longkak aitba sentong koda agiyonga aotsü iba indang metetdaksütsü. Job-card bena alir shirnok nem taa magütsü arudar parnok million 5 shi-i züluba shiti Ato Kilonser dangi yokogo," ta Banerjee-i ashi.

Tanga osang ka ajanga Banerjee-isa, Bharatiya Janata Party (BJP) dang parnoki nokdangtetra iba longkak aitba sentong ya nokdangang ta shiogo.

"Tetsükdaksü kechisa lidir liaka WB sentoka toktsüba aser tangutsü tim manguba anema rara maneni aotsü. Alima nung tashi kechaia ni WB nung aliba nüburttem aser parnok fundamental rights atema raratsü asoshi bendang agütsür aliba menokdangtettsü. October 2 aser 3 nü Delhi nung longkak aitba sentong nung nia shilem agitsü. Nenoki ni nokdangtetra nokdangang," ta TMC general secretary-i X sabang nung post sütsü.

West Bengal sorkari ashiba agi, BJP-i aniba central sorkari MGNREGA kübok sen crore 7000 aser PMAY scheme kübok sen crore 8000 densema scheme balala asoshi 2021 küm December ita nungi state nem senotsü magütsü arudar.

Centre-i state nem sen lakh crore 1.15 dak tema magütsü lir, ta TMC lenirtem ashi.

Kasa mapang nung September 30 aser October 4 nü Ramlila Maidan nung mener longkak aittsü atema police-i TMC nem temelaba magütsü liasü.

Iba sülen Jantar Mantar aser Krishi Bhavan nung longkak aittsü temelaba meshia liasü.

TMC lenirtem, pusemertem aser job card bena alirtem Delhi Mongolbarnü atongtsü imlar.

NCP shibai tentet aji ajaki jangja lir: Sharad Pawar

New Delhi, Mongputeni/October 1 (Agencies): Nationalist Congress Party lemdangba dak sendakba nung Election Commission-i ken o angadanga mapang Sharad Pawar par telok nungi shilem agitsü. Ken o ya October 6 nü New Delhi nung angadangtsü.

Deobarnü Pawar-i, Election Commission-i ni jaokogo ta ashiba den party shibai tentet aji ajaki meteta lir, ta ashi. "Nüburttemi kechi bilemer aji tongtambang. Nisung kari parnok tebilemba lemsatepogo aser ni iba dak sendakba nung telangzüba magütsüner, kechiyong democracy nung aji parnok temeden lir. Ajisüaka Maharashtra aser linük ajungai NCP shibai ngutet aji meteta lir. Ken o ya onoki akoktsü akok ta nüburttemi ashiba nung ochi dena lir," ta Sharad Pawar-i ashi.

Sharad Pawar-i jenjang agiba dak sendakba nung ken o mejangjai aliba mapang tang iba

olen lemsatepogo. July 2 nü par adianu Ajit Pawar, Maharashtra nung Eknath Shinde sorkar nung aden. Sharad Pawar ya Indian National Developmental Inclusive Alliance nung tongtambang lenir ka lir. Pai meima par adianu (nephew) pusemer ta shia temulung melemi aliba mapang ka nung pai pa INDIA bloc metoktsütsü ta shiogo.

NCP lenir Supriya Sule-i Deobarnü ashiba agi, NCP yongtsü nung kecha mangatettep mali kechiyong NCP tetezüji Sharad Pawar lir. "Kashmir nungi Kanyakumari tashi nung nüburttemi NCP tetezüji Sharad Pawar ta meteta lir. NCP national tirji Sharad Pawar aser Maharashtra state tirji Jayant Patil lir. Party temaitsü ya mamshitetsü akok ta asüba kecha tasüngdangba mali. Party ya Sharad Pawar-i tentet anungji party temaitsü ya-a pa meyong lir," ta Supriya Sule-i ashi.



Gandhi Jayanti matong tsüngda Samvidhan Sadan aser Parliament House complex nung 'Swachhta Pakhwada: Swachhta hi Seva' campaign kübok merekmeju sentong ayongzüka agiba mapang mapa inyakertem tangokba noksa nung angur.

PM Modi-i Telangana nung infrastructure project tem lapoktsü

New Delhi, Mongputeni/October 1 (Agencies): Warangal nungi Khammam tashi km 180 talang four-lane access-controlled greenfield highway densema tongtambang lenmangtem yanglutsü asoshi PM-i nüngshilong azüngtsüogo.

Ato Kilonser Narendra Modi-i Deobarnü Telangana kübok Mahabubnagar district nung video conferencing ajanga developmental project balala atema nüngshilong azüngtsüba den sen crore 13,500 intoka yangluba project balala lapoktsüogo.

Iba den bendeloksema India sorkari, Telangana kübok Mulugu district nung sen crore 900 intoka Central Tribal University ka yanglutsü aser iba university dang Samakka Sarakka Central Tribal University ta ajatsü, ta iba project amenoktsüba sülen PM-i ashi.

Paisa, Centre-i, turmeric lu ayimertem ajangzükdaksütsü

atema National Turmeric Board ka amenoktsü asoshi telemtetba agiogo, ta ashi.

Deobarnü Ato Kilonser-i, Nagpur-Vijayawada Economic Corridor kübok tongtambang lenmangtem atema nüngshilong azüngtsüogo, kong NH-163G kübok Warangal nungi Khammam tashi km 108 talang four-lane access-controlled greenfield highway aser NH-163G kübok Khammam nungi Vijayawada tashi km 90 talang four-lane access-controlled greenfield highway densema lir. Item lenmangtem ya sen crore 6,400 intoka yanglutsü, ta sangdong ka ajanga metetdaksü.

PM-isa, NH-365BB kübok Suryapet nungi Khammam tashi km 59 talang four-lane lenmang ka lapoktsüogo, koba sen crore 2,460 shi intoka yangluogo. Ano pai, Jaklair nungi Krishna tashi km 37 talang Railway Line tasen ka lapoktsüogo.

Iba rail line ya sen crore 500

intoka yanglua liasü. 'Hassan-Cherlapalli LPG Pipeline Project' koba sen crore 2,170 intoka yangluogo, iba line ya-a Deobarnü semzüksüogo. Maneni Modi-i Krishnapatnam nungi Hyderabad tashi Bharat Petroleum Corporation Ltd (BPCL) indang multi-product petroleum pipeline ka asoshi nüngshilong azüngtsüogo. Iba km 425 talang pipeline ya sen crore 1,940 intoka yanglutsü.

Project tasen semzütsüba tem rongnung ano Hyderabad University -- School of Economics; School of Mathematics & Statistics; School of Management Studies; Lecture Hall Complex - III; aser Sarojini Naidu School of Arts & Communication (Annexe) indang ki tasen pongu semzüksüba densema lir. Modi-isa, Krishna station nungi video conferencing ajanga (Kacheguda)-Raichur-Hyderabad (Kacheguda) train service tenzükja liasü.

Vivek Johri-i Mauritius NSA mapa abentsü

New Delhi, Mongputeni (Agencies): India indang intelligence officer Vivek Johri-i, Mauritius indang National Security Advisor (NSA) mapa abentsü. Linük ana tsüngda tenangzütepa kübok shilem ka ama pai iba mapa agizükogo.

NSA ama Indian security officer yagi counter-terrorism ken o ajak achaayangtsü. Pa India NSA aser Mauritius PM den sendaktepa inyaksangshitsü.

Johri ya tingdang ketdangsür ka lir. Intelligence officer ka ama pa Nepal aser kidanger linüktem nung inyakogoo. Ken o tasak aser tebenja achaayangtsü asoshi

pa tajangshiba peria lir.

India aser Mauritius na mapang talangka nungi tesendaktep tajung lir. Linük ana tesendaktep junga aliba kuli rongnung kaji iba asetkong nung nütsünyongsük million 1.2 aliba nungi shilem 70 bo India nung lir, ta Ministry of External Affairs (MEA)-i metetdaksü.

Maneni linük ana tsüngda maritime security, development partnership, capacity-building, aser international fora cooperation nunga tesendaktep junga lir.

Kasa mapang nung Mauritius nung India-i teyari agüja yangluba project tem

aika amenoka lir. India aser Mauritius nung teresendaktep reloka aotsü atema Mauritius nung Indian Cultural Centre aser World Hindi Secretariat nati teyari agütsür.

Mauritius timtem aser mepetmesü mapang nunga yimya India-i tama teyari agüja arudar, kong Covid-19 wara poktetba mapang aser Wakashio nung totzü inshiba mapanga teyari agütsüba densema lir.

2005 küm nungi India ya Mauritius atem trading partner tulutiba lir. 2021-22 küm Mauritius ya India indang FDI source tulutiba rongnung tasembuba liasü.



External Affairs Minister S. Jaishankar den US dangi India Ambassador Taranjit Singh Sandhu na Washington nung India nungertem den telongjem mapang ka akaba mapang tangokba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, MONGPUTENI (OCTOBER) 02, 2023

Police aser tesayur sülen Arogo koda ?

Nagaland melenshitsü atemabo police aser Education department den arogo nunger melenshi nung odang ajak melenshia adoktsü ta bilemer. Iba tangatetba nung police-tem taküm yimya melenshitsü merangba ngua kaketreju nung tesayurtema melenshi nung kanga jungla ta bilemba ka asenoki taoba hopta nung iba yimobilem nung lemsatepogo. Aji oda, Nagaland nung police o tesayurtem na taküm yimya tajungba küma melenshir nübortem asoshi pei tenzükba mapa nung bendanga agüja tenzük nungbo, iba kisüng jagi Nagaland nung nungdakba temelenshi tesadang kabo bener arutsü. Anungji, tanüngba tesadang kaji melenshidaktsütsü atema asenok arogo nunger melenshitsüla, kechiyong arogo nunger melenshi nungbo asenok ajak melenshir asütsü. Arogo nunger ajanga Nagaland melenshitsü atema mapa temela kaji, tangbo Nagaland nung tsümar Indian Civil Service nungi aruba tulurtem kar dak alaka department ajak nung Naga nungertem lir aser Naga nungerji ajak arogo nunger lir. Aji koda tajung ! Government nung item Naga nunger tokolaktemji melenshira pasasa tsünglanglenji melenshiyonga alutsü. Asenoki Nagaland tajungba kümdaktsünüra temelenshiyibo yamajiang tenzükttetsü. Ajisüaka, itemji ataloktsü atema ano arogo nungsa süaka arogo sannüker aser deacon-temi inyaktsü shilem tuluka lir, kechiyong temelenshi tajungji tilaka nung dang süaka arogo lenirtem taküm nungi tenzüksüla. Aji oda, temelenshi aginüba agi asenok timtem aser makamait arema inyaktsü aser tenzüksüba tesem aika lir. Item rongnungji arogo nung lenirtemi arogo makamait arema Rural mesüra Urban Development department ama nungi nübortem asoshi aruba senotsü aser oset-tem meshizüka arogo tenla ki aser kiojen meyanglutsüla. Tatishitsü ka, arogo kati RD minister-ba dang yimtak lir kibong ishika tenüng nung teyari meshizüka bener orr tenla ki asünung, aji temeshi tenla agi asütsü na ? Iba jagi arogo-i department inyakyim merüktetsütsü melen menentsür masü nuo ? Ibaji dang masü saka timtemaka, talisa, arogo nung tenzükertemibo pei chirtnurtem asoshi 'backdoor' nungi mapa mebushitsütsüla. Asenok Tsüngrem tenzükertemi anir minister, Secretary aser Director den 'backdoor appointment' atema sarasademer senshi nungbo tangar 'Front door' nungi aittsü ataa alirtem asoshi koma sarasademtsütsü ? Atangji, arogo nung tenzükertemi anir Nagaland melenshitsübaji mapa tasak aika lir aser item rongnung tasaktibaji samaba santem tonga-tonga oa bushia anir arutsüba ya asütsü. Aji oda, sannüker asoshi samaba santemji kodanga mengudangba aser Kibur temeim ola mangashidangba san masü, saka par meyong san ki bushia maruba santem indang Laishiba nung o intepba ka shia angur. Iba o intepba nungbo san noklang nung tukortukobo san kidang shitak arua lir saka san ka samaba mangu tashi bushiba indang ashir. Ajisüaka, tanü Nagaland nung melenshitsü nungdakba nungbo sannükertem tebilemstü aser khuretji san noklang nung ka samaba otsü masü saka san tukortuko samar san kidangbo san ka dang aliba otsü aser tensa tia indang jembir, anungji samaba san tukortukoji sannükertemi tangar nem mebushidaktsüi peisasa bushitsüla. Nagaland melenshidaktsünüra arogo office-tem ya government office ama mekümi Tsüngrem o angatetdaktsüdak aser taneptsü aser khu reta abenertem asoshi anisüngzük angudak küma yanglushitsüla. Aji oda, arogo nung sannüker aser deacon-tem mapaji 'Ceremonial mapatem' kibong kümtsütsü, asü pila sentep lir tasü mang rema yutsütsü, küm agi meshir tzüsentsütsü aser tasoba anogo mongtsütsü ta asüba ketdangsuba mapatem kijabo masütsüla. Nübortem timtem shisabolu mapang aser shilu manem dang mulung anisüngzüka tesünep aser taneptsü angutsü atema nungbanga bushitsüsa arogo nung tenzükertem alitsüla. Yisu kong lidir yangji pei pei shisabolu aser taginüba bener nübortem adenshi, kasaji arogo lenirtem dak nübortemi anisüngzük angutsü imlaseta bushitsüsa tashika alitsü tim. Bilemdangdi süra, tanü arogo nunger shirang dang aser shisabolu agi atongdanga, asüpila sentep agitsü ashiba dak alaka, arogo aika nung nütsüngi tenzük sarasademi majar aser mebushir ! Aji kechiba ? Iba jagi asenok tenla ki liaka, itemji toktsür shisabolu khuret abener nübortemi 'Prayer Home' bushir ! Atangji, iba tesem nung yabo Police aser tesayurtem dang nungi tama temelenshi nungdakar.

OLEMSABANG

MISSION TO THE NAGAS ASER OKADAK AROGO OTSÜ TEMETEN BUSHIBA : O RAJEM

~ Molungkimong Literature Board

(Yashi adok nungi...)

5. "Rev. Dr. Clark-i anir 1876 Molungyimsen akümdangji Pastorbai Naga tenem nung arogo otsü ajakji yim tasen jagi bener ai nungji.."

Zülua aliba kuli-o-tem kecha nunga Dr. Clarki anir ao ta mali. Yamai lir. "As most of the Christians and those favorable to Christianity were determined to go, I went with them." (Haimoung, Sixty-Third Annual Report. The Baptist Missionary Magazine, 1877 July, p. 216). Yamaji süaka, 24 October 1876 anogo Molungkimong süngkum alema baptirtem aser mepabtirtem ajak meyokteper kibong 15 dang ayi. Iba kuliji Mary Mead-ia la kakat nung agüja lir (Ref: Mary Mead. A Corner in India. 1907, p. 20).

Arogoji bener ait ta asuba ya yamai langzür. Ya Clark talidak Mission Station tesem melenba saka Arogo bener ayiba masu. Kechiyong tamanger (6) aser mamanger (9) ta kibong 15 meyokteper ayiba. Station indang terasa tera yamai agütsür.

MEZÜNGBUBA MISSION STATION (Primary sources).

Iba mapang, American Baptist Missionary Union indang Assam Mission kübok Mission Station pezü Iiasü - Gowalpara, Gowahati, Nowgong aser Sibsagar. Mission Station ta asübaji, koba nung American missionary lenisüa telidak Iiasü, iba tang aja (62nd Annual Report, Baptist Missionary Magazine. p. 199).

1876 kum Assam mission nung Mission Station tasen ana renlok. 1876 March ita nung Dr. Clark Sibsagar Station nungi Molungkimong alitsü atu aser yangji Haimoung Station aküm (Baptist Missionary Magazine. P. 381; Clark's letter dated 18 Oct 1876 and ABMU 63rd Annual Report) aser Rev. E. G. Phillips aser tebuttsü na November ita nung Gowalpara Station nungi Tura nung alitsü oagi Tura Station tenzük (Rev Phillips' letter to Home Board dated 17 Dec 1876 and ABMU 63rd Annual Report).

6. "Saka Molung nunger rongnung iba yimsu tajung ya Molung lushi nungi bener yoktsü mumolung nung parnoki Rev. Dr. Clark dang Molungkimong nungi mile ishika our Molungkong nung yim tasenji akumtsü asüngdang nung paia hai ta langzük."

YIM TASEN AKÜMBA OTSÜ (Primary and Prime sources)

Dr. Clark Molungkimong nung aliba mapang, Kosasanger putu aser Rionsanger putu tsüngta mepetmesü ka adoka Iiasü aser Rionsanger putu temi anir yim tasen ka akümstü atong ('The Haimoung villagers had long been talking about a much better site for a village on their land.' Clark's letter dated 21 March 1877). Ibai kecha tasen meliasü kechiyong tesüiba mapang nunga yamaji kimong tasen bushia aoba Molungkimong otsü nung lir.

Iba mapang, Dr Clarki Molungkimong yimsüsür dang mission bungalow, tenla ki aser mission school asütsü atema kimong asem (Pongen Reju Kimong, Aong Reju Kimong aser Süngkong Kimong) meshia asüngdang. Anemponga benshiba tongtipang kimongtem asünungji, Molungkimong yimsüsüri item kimong magütsü saka tanga jaka nung pai aginüdak agütsütsü ta ashi.

Yim tasen küma onertemi Dr. Clark dang pai arunüngbo, tesemji pai aginüdak shimdaktsütsü ta ashi. Yim tasen akümstüji Molungkimong yimsüsür aser tebu Chungtia-i kanga nokdang ('and those who preferred to remain at the old village made much more opposition than was expected.' Clark's letter dated 21 March 1877) saka parnoki manga. 24 October 1876 anogo anüla ken-o atsüsteba yim tasen küma yoktsü-meyoktsü jembir saka Merangkong nunger den nüpu ayonger asünung, nikongdang parnok kibong 15 (tamanger 6 aser mamanger 9) den Dr. Clark dena yaki Molungyimsen yim tasen ji aküm (As most of the Christians and those favourable to Christianity were determined to go, I went with them.' Clark's letter dated 21 March 1877). Parnok yim doktsür apusodang temolung raksatepa menungra kinüngertemi khu benoktsüba otsü tang tashi jembir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Kangtsüng nung ABAM-i 'The Art of Life in Fullness' sentong ayongzük



Dimapur, Mongputeni/Oct. 01 (TYO): ABAM kübok arogo lenirtem Tsüngrem O den külemi santem taküm rangpen anepalutetsü nükjidong nung 'The Art of Life in Fullness' sentong ka September 28 nungi 30 tashi ABAM Resource Centre, Kangtsüng (Aopenzü) nung kaogo. Iba sentong ya ABAM kübok Zone 4 arogo lenirtem asoshi aka. Iba sentong ya UN 17 Sustainable Development Goals dak rangloker renemba lir.

Iba sentong ya September 28 nü Rev. Temshi Longkumer, tir, ABAM; Rev Dr. L. Lima Jamir, tatong tir, ABAM aser Maong Jamir, Finance & Property Secretary, ABAM, aser sentong ajak asoshi Rev. T. Aliba Imchen, ABAM Resource Board Convenor-i sarasadema tenzüik.

Dr. Sentitula IFS, DFO Mokokchung ajanga sentong akaba mangdang indang lemsatop. Tanü iba ama keraa melenshiba putu nung Arogo lenirtem tangatetba nung

ayimjema tenzüiktsü asoshi iba ama sentong kanga rongdak nungdak ta lemsaa liasü.

Iba sentong nung shisalen sayurtem item ya liasü; Dr. Sentitula, C. Bendangonen Jamir, Mission Director Chuchuyimlang Baptist Church; Dr. Merenlemla Imchen, Rapha Physiotherapy Mokokchung; Dr. Imtiwati, Asst. Professor, College of Veterinary Sciences & Animal Husbandry, Jalukie; Meyasashi, Director, Horticulture, Nagaland, Kohima; Ruokuosietuo Dzuovichu, District Soil Conservation Officer, Mokokchung; Senti. Ao (Retd. IAS), Padampukri, Dimapur; T. Imlisunep, Principal, ITI, Mokokchung; Martha Chakruno, ACTO (Plant Protection), KVK, Yisemyong aser Maong Jamir, ABAM.

Shisalen sayur balalai item onüktem lemsatopa liasü; Livestock economy for Sustainability, Food Security and Employment generation, Sustainable Agriculture, the

Parnoki anema nokdakba nung shilem ka ama parnok tanurtem iba school-i yokba anen aser iba yimtsüng nung government school ka meshia liasü. Ajisüaka Education Department and Revenue Department ajanga parnoki akhangba magizük.

Kasa mapang longkak aita tanurtem Transfer Certificate meshitsü merangba maparen nung yakbang sür alir Hindu nung kar anema Tehsildar-i ashishitep ken o ka benoka liasü.

Yimtsüng nung kin balala tsüngta mangatettep adokdaksüba mechi police-i Hindu nung nisung 12 apu. Parnoki Madurai Bench of Madras High Court nung bail meshia liasü, saka magizük. Parnoki bail petition agütsüba

Spring Rejuvenation and Water Conservation methodologies, Overview of the Rural Development, Skill Development, Living the Gospel, Homiletics, The Art of Life and Christian Entrepreneurship.

Aonung sentep ajak kenten benjong liasü aser item nüburtemi shilem agi, Sanipong, Assoc Pastor (Youth), Chuchuyimlang Baptist Church; Arenkaba, Assoc Pastor (Youth), Kangtsung aser Imli, Assoc Pastor (Youth), Tuli Town.

Anepdang tekülem sentong Alem, Pastor, Chami aser Rev. Moa, Pastor, Tuli, tenati bendanga agi aser Tenlamongla Longkumer, Manager, ABAM Resource Centre ajanga sentong tema tatenertem nungi sentong nung tajanzük anguba aser tashi maitbatem benden zülua ayu. Tatem nung Rev. I. Nukshi, Pastor, Merangkong Baptist Church ajanga sarasadema sentong tempang.

TN nung tanurtem Christian school-i meyokba mechi Hindu nung er apu

Chennai, Mongputeni/Oct. 01 (Agencies): Hindu nung kari parnok yimtsüng nung külem Hindu nungertem Khristan yimsü agizükba anema mapa kar inyakba nung pua alirtem nem Madurai Bench of Madras High Court ajanga bail magütsü.

Iba yimtsüng nung arogoi lapokba school kati Hindu nung tanurtem yimsü melendaktsütsü merangba sülen tsürabor temi parnok tanurtem iba school-i yokba anendaktsü. Hindu nung tsürabor temi pei chirtem Transfer Certificate meshitsü dangartem ajungmesoba ajanga kin balala tsüngta mangatettep adokdaksü, ta shia court-i parnok nem bail magütsü.

CSI arogo-i sorkar teyari nung lapokba primary school nung tanurtem tamangba yimsü melendaktsür, ta Tenkasi district kübok Achankuttam yimtsüng nung aliba Hindu nungertemi tai tongloksü.

Iba school ya 1928 küm lapok, aser school ki tejen

akumba mechi arogo ketdangsüri school ki ya raksar tekülem ki ka yanglutsü merang. Yimdaklir temi iba maparen anema nokdak aser arogoi tanurtem Khristan yimsü dangi meyipdaksütsü meranger ta August ita aija liasü.

Parnoki anema nokdakba nung shilem ka ama parnok tanurtem iba school-i yokba anen aser iba yimtsüng nung government school ka meshia liasü. Ajisüaka Education Department and Revenue Department ajanga parnoki akhangba magizük.

Kasa mapang longkak aita tanurtem Transfer Certificate meshitsü merangba maparen nung yakbang sür alir Hindu nung kar anema Tehsildar-i ashishitep ken o ka benoka liasü.

Yimtsüng nung kin balala tsüngta mangatettep adokdaksüba mechi police-i Hindu nung nisung 12 apu. Parnoki Madurai Bench of Madras High Court nung bail meshia liasü, saka magizük. Parnoki bail petition agütsüba

nung parnoki kin balala tsüngta mangatettep madokdaksü aser police temi Revenue Department ketdangsür nungi taila complaint meshir parnok apu, ta shia liasü.

DMK sorkar indang counsel for criminal matters ajanga ashiba agi, kechi südir süaka tanur ajak class 5 tashi shisaliok agütsütsüla aser tanurtem school-i meyokba ya oziung anema lir.

School Education Department ajanga item tanur indang tsürabortem nem osang agüja liasü, ta pai ashi. Hindu nung temi inyaksangshiba mechi tensa mejungi akumtsü akok, anungji parnok nem bail magütsütsüla, ta pai ashi.

Tamangba yimsü nungi tanurtem kumzüktsü merangba mechi tsürabor anema Right To Compulsory Education Act (RTE) amshiba ibai mezüngbuba alitsü akok.

Tarutsü nung tsürabortem anema RTE ya hadir ka ama amshitsü akok, ta activists temi mapang talangka nungi tekumdangtsü shia arur.

ANOGO ABEN TSÜNGREM DEN

Rongsen timtem

"Aser Abram nashinüker O Lot nashinüker na raratepa adok" (Lipok 13 : 7).

Rongsen nung timtem aliba tetka tanga nung mali. Rongsen renlokdang kibong nung alir rongsen nung mangatettep adoker. Rongsen arendang temeim arenbaji kanga ajema lir. Lalushipong rongsenji tashiyim yipten ka akümer koba nung jabujari mejangba tashi itta kümdaktsür. Kechiaser morumoruji takok den lidaktsür. Taka tia aser sensak tia, anapronglai tanüla mokonga kümdaktsür. Morumoruji tongtibang masü yimya amuokba lir. Tenük meremji iba nungi adoker, aser nükmerem jagi rarabangsen ajungmesor.

Anungji rongsen jagi tatidangba tali adokdaksür. Jungtepba jagi takaba renlokdaktsür. Anungji tia tajungji tali kümdanga agizüktsü tenüngdaktsü. Asen Tsüngremi mi aketba lijakjang sepdaktsüba takok nok-o-nü asen nem agütsütsü.

Abrahami marakzüi Tsüngrem dak amang. Terotu nung raksatsüba lendong ajak nungi Kibubai pa kümzük. Pa rongsen renloktsü, saka aji pa taküm aser Tsüngrem tsüngda nung ambangyim agi amshitsü memela. Pa azükaruba mapang songjen pai tematiba akümbok nung jenok, aser tematiba aküm kübok ali.

Pa dang yamai shidi: Taküm aser rongsen ne temoatsütem lir. Nai mulungba nung alitsü aser amshitsü sayuang. Amen.

Pakistan nung Khristan lanurtem asoshi capacity-building sentong ka ayongzük

Lahore, Mongputeni/Oct. 01 (Agencies): Ecumenical Commission for Human Development (ECHD) aser Pakistan Partnership Initiative (PPI) lungjemer Khristan lanurtem asoshi "Sustainable Development Goals Through The Perspective Of The Holy Bible And Christian Faith" nungja agütsür capacity-building workshop ka Lahore nung September 29, 2023 nü ayongzükba liasü.

Iba sentong nung o jembirtemi meimchir tsüngta temeim asoshi aser kati ka den yimjung nung alitsü asoshi Khristanpur dang sayuba ama alitsü ajungshia liasü.

Iba workshop nung adenertem den jembidang social activist aser trainer Asher Shahzad Gill-i alima tebilemstü koktettsü atema SDGs ya kanga tongtipang lir ta ashi aser lanurtemi inyaktetsüba indang angatetdaksü.

"Tebilemstü ajak atema makamait ya tetsü lir. Alima nung constitution tajungtiba aser water management system tajung asen linük nung lir. Saka nüburtem asoshi sentong yangluba nung tamakok angur, kechiaser asenoki sentong yanglua amshiba nung tajungba kuma meyangluteter," ta pai ashi.

Forman Christian College, University nung senior faculty member Naureen Akhtar-i iba sentong nung lipajen wazüka ayuba tsütsü lanurtem shilem indang jembia Tsüngrem, nisung aser dangartem tsüngta

tesendaktep indang athishia liasü. Kibong aser loktiliba nung tebur tekolak asüba ajanga meimchir tesendaktep aser lipajen raksar ta lai ashi.

"Lanurtemi SDGs indang yimya junga memetet. Arogo kisüng yutsür, iba nükjidong tongtettsü asoshi danga arogotem den külemi inyaktsü memolunger. Item tebilemstü angatettepa mesüra sorkar den lungjemer inyaktsü melena arogoi temenen, maksü, aser aibelen inyakba nung rangloker," ta lai ashi.

Tamangba yimsü nung ajemdaker lanurtem nem tashi temeden agütsütsü aser pei sasa pei peria alitsü lenmang sayutsü nükjidong nung iba workshop ya ayongzük, ta ECHD Executive Director James Rehmat-i ashi.

"SDGs yariba Lai tamendak dak aser jenjang indang lanurtem nem angazükdaksüner aser mera tapet agitsü ajungmesoner. Iba yagi lanurtem nem practical skills, shisatsü aser pei aliba tesem nung SDG dak sendakba project aser sentong balala nung yaritsü hadir tem agütsür," ta pai ashi.

Iba ya ajanga Khristanpur tsüngta telungjem, jembishinüba, tamangba yimsü balala nungi aruba lanurtem tsüngta amalitep akatsü imlar, aser tamangba yimsü nung loktiliba aser lipajen wazüka ayutsü tesayuba kasa ajanga parnok ajungmesoa pei alidak aser alema orr mapa tajung inyaktsü teimla lir, ta ECHD executive director-isa ashi.

AO OSHI ANGAZÜKDAK:
TANÜ ANGAZÜKTSÜBA OJANG



Sangja

(n) rara nung amshitsü atema au agi anatsülen ajua yangluba oset

(bamboo spike pointed at both ends used as weapon)

* Akhidangbo raraba mapang sangja dang amshia liasü.

Sangken

(n) sentsü jet ta melentetba shiruru ka (lizard)

* Manga merila chidaktsütsü atema sangken metepsettsüla.

OLONG PAITEP # 6654

	1	2		3	4	5
6					7	
			8	9		
		10				
11						
			12			
13	14	15				16
17					18	

TIPLÉN

- 1. Inyaker ajangtetba - (3)
- 3. Bangsemo adokdak - (5)
- 6. Shitak mesüi inyak - (7)
- 7. Ya mimong nung angur - (3)
- 9. Reprangzük - (4)
- 10. Tasola - (5)
- 11. S _ _ _ _ - (4)
- 13. Yagi ajak ashiochtsür - (3)
- 15. Ki aokba oset - (7)
- 17. Ak shi nung inokba tasen - (5)
- 18. Ishika - (3)

LANGTSÜNGLEN

- 1. Meshidak - (3)
- 2. Tanaben soshir - (7)
- 3. Iba anogo - (4)
- 4. Meshi - (3)
- 5. Yagi mi tsükloker - (9)
- 6. Shi tapu ka - (9)
- 8. Yagi ayimer saka ozü masü - (3)
- 9. Ajokba shiruru ka - (7)
- 12. Inyaktet - (4)
- 14. _ _ _ hi - (3)
- 16. Akümüli nungi pilar - (3)

OLONG PAITEP # 6653 TELANGZÜBA


TIPLÉN :

- 3. Tatem, 5. Jabaso, 6. Kotak,
- 8. Ara, 9. Aut, 11. Lungpok, 14. Pua,
- 16. Len, 18. Nükpok, 19. Ozüng.

LANGTSÜNGLEN :

- 1. Ajuru, 2. Jaja, 3. Toktep, 4. Tatsük
- 7. Kasa, 10. Alem, 11. Lemtsü,
- 12. Nüpang, 13. Temko, 15. Aika.

NAI-A YA METETTER MA



Shah Rukh Khan-i tongti shilem agiba Jawan film ajanga otsü tasen aika yangluteta arudar. Iba film ya September 7, 2023 nü mezüng saya aser tang tashi nung worldwide Box Office nung Rs 1086 crore tashi aazükogo. Jawan film ajanga bendanglen Rs 361.35 crore aazükogo aser ibaji \$43.55 million lir. Jawan film sayaba sülen anogo 24 buba tashi nung India nung Rs 600 crore tera agi dang matong lir. Iba film nung Shah Rukh Khan den Vikram Rathore, Nayanthara Narmada, Vijay Sethupathi, Kalee Gaikwad, Deepika Padukone, Aishwarya Rathore, Sanjay Dutt aser Madhava nungeri shilem agia lir.

Mizoram nung African Swine Fever ajanga Rs 534.42 crores akoksa

Aizawl, October 1, 2023

(Agencies): Mizoram nung African Swine Fever (ASF) wara ajanga timtema arur.

2021 nung ASF ajanga ak 12,568 tepsettsüsa aküm. Iba sülen 2022 nunga ak 11,594 tepset. 2023 nung ASF wara tasembuba nung ak 980 tashi süogo aser wara noktangtsü atema ak 590 tepsetogo.

Mizoram nung ASF ajanga rongsenketzüng tsütsü takoksa jenti nguogo. ASF mezüng aser tanabuba nung Rs 534.42 crores shi akoksaogo. Iba wara ajanga yimtsüng aika nung kongshia

liasü.

2021 nung ASF ajanga yimtsüng 272 nung kongshi aser 2022 nung yimtsüng 149 nung kongshia liasü. Taküm yimtsüng 29 nung African Swine Fever agi tonga lir.

June ita wara tera aziüoktet saka July nung ano temai adok aser Champhai, Khawzawl den eastern district tem nung prokshio.

ASF tebilemstü koktettsü atema tanga state tem nungi ak aser akshi bener aruba ajemogo aser sorkari domestic production ajungkettsü atema

mapa balala tenzüko.

Mizoram nung ASF wara ya mezüng March 2021 nung Lunglei district kübok Lungsen yimtsüng nung putet. Iba yimtsüng ya Bangladesh arrtsü anasa lir. 2021 nung ASF ajanga ak 33,417 asü aser ak 10,900 tema tepset.

Mizoram nungsa 2013, 2016, 2018 aser 2020 kümtem Porcine Reproductive and Respiratory Syndrome (PRRS) wara adoka liasü. Iba ajanga ak aser ak chanu meyirjang aika asü aser Rs 10.62 crore shi akoksa liasü.

Imphal nung tetsür shishilembartemi PM Modi posters shisatsü

Imphal, October 1, 2023

(Agencies): Imphal nung tetsür shishilembartemi tejashi sayua Prime Minister Narendra Modi indang posters shisa endoktsü. Manipur nung kaketshir ana tepsetba anema parnoki lungkak ait.

Lukmai Sellup ta ajaba tetsür shishilembartemi PM indang Swachhata Hi Seva 2023 campaign mokdang.

"Onoki PM aser campaign tem mokdanga arur kechiyong

July 6 nü kaketshir ana- H Linthongambi aser H Hemanjit na samaba aser tepsetba atema pai ola madoker" ta Lukmai Sellup general secretary Asem Nirmala-i ashi.

Ita shia PM-i Monthly Baat program agiba onoki mokdangogo kechiyong PM-i Manipur nung tensa süngjemtsü atema mapa meinyaker ta lai ashi.

Imphal nung aliba Ima market meketa Swachhata Hi

Seva 2023 campaign tenüng nung PM Modi indang posters ayu saka Deobarnep tetsür shishilembartemi posters shisatsü.

Lukmai Sellup züngsemtemi parnok senotsü amshia Imphal nung women's market centers asem merükmejua inyakogo.

Manipur nung kaketshir ana tepsetba atema nisungtem jashir aser parnoki sorkar dang sensotem kümzüka meyuteter ta tai tonglokttsür.

APSC ken o atema SIT tasen tentet

Guwahati, October 1, 2023

(Agencies): Assam Public Service Commission (APSC) 2014-15tatidang ken o dak sendakba atema Special Investigating Team (SIT) tasen ka tentetogo.

Iba ken o atema temeten bushiba nung nisung shinga meyutsütsü ta Assampolice-i ashi.

"APSC ken o nung taoba Investigation Officer (IO)-i candidate 34 indang answer books forensic analysis atema meyoctet" ta Assam Chief Minister Himanta Biswa Sarma-i ashi.

"Taoba Investigation Officer-i teinyaktsü shitak meinyakba ni meteta liasü. Ni iba bushisüngdang nung tebang mai kechiyong independent bushisüngdangba liasü, saka High Court-i asüngdangdang ni iba osang metet. Tang state

sorkari forensic analysis atema answer books yoktsü" ta CM Sarma-i ashi.

"Aibelener ajak merenshitsü. Nisung shinga onok kinunger masü anungji aibelenba putetra parnok ozüng tapet agi merenshitsü" ta paisa ashi.

"Biplab Sharma Commission-i APSC examination 2014-15 nung candidate ajak mapa nungi anentsütsü ashi. Ajisüaka iba ya lemtet tasak ka lir kechiyong candidate karibo parnok merangba aser bendanga agütsüba ajanga takok angu" ta CM Sarma-isa metetdakttsü.

"2014-15 tatidang nung takok anguba candidate ajak mapa nungi agienra government administration nung tetsükdakttsü alutsü kechiyong parnok karbo bendanga agütsüba ketdangsurtem lir.

Anungji iba onük ya jungjunga bilemdangtsüla" ta paisa shisem.

Sorkari commission dang nungi report tanabuba atar. Iba report nung kasa onük lira sorkari tayongzükba tulu ka ajurutsü, ta Sarma-isa ashi.

APSC ken o atema APS Officer Surjeet Singh Panesar-i Investigating Officer ama inyak. September 29 nü Assam Chief Minister Himanta Biswa Sarma tetuyuba nung ajemdaker Special Investigating Team (SIT) ka tentetogo.

Iba SIT ya Indian Police Service (IPS) ketdangsur ADGP Munna Prasad Gupta lenisüba kübok lir. SIT nungsa Joint Commissioner of Police, Guwahati Thube Prateek Vijay Kumar, DSP rank officers 2 aser inspectors 2 densema lir. Parnoki ita 6 tsüngda osang agütsütsü.



September 30, 2005 nü Williamnagar aser Tura nung lendong atalokdang asürtem bilemteta memorial service ka agiba angur. Iba lendong ataloker küm 18 ajunger aser South West Garo Hills (SWGHL) nung NGOs ajanga dokan ajak shibanger tasür 9 nem tetushi agüja mongogo. Iba anogo dang 'Black Friday' ta ajar aser Tura o Shillong tsüngda Meghalaya Board of School of Education (MBOSE) lemsatsüba anema lungkak aيتدang nisung 9 taküm sama.

Pei temang nung bomb alenoker pokdaksürtemi Ankara amak



Ankara nung bomb apokba tesem Turkish security forces temi lungbanger aliba noksa nung angur. Takum bendanga agütsür bomb pokdaksür kati Turkey yimtiba Ankara tiyong nung parliament tenzüksü ghonda ishika lia Deobarnü bomb pokdaksü. Kasa yimya nung bomb pokdaksütsü arur ka police temi khaset.

"Parliament tenzükogo. Tir (Recep Tayyip Erdogan) nung parliament-i arutsü imlar," ta lai ashi.

Koseoglu-i ashiba agi, iba tesem shirnoki amak iba indang tang tashi mejangjai lir.

Turkey ketdangsürtemi ISIL (ISIS) züngsemtem meita aoba mapang ka nung tang iba lendong atalokogo.

Ketdangsürtemi ashiba agi, iba tesem temeket nung temulung melemba oset aika ngutetogo aser mongintemi detonate sütsüyonga odar.

Iba tesem amakba dak sendakba nung judicial bushisüngdang ka tenzükogo, ta Turkish Justice Minister Yilmaz Tunc-i ashi.

"Iba tesem amakba ajanga Turkey-i kiralongrartem anema raraba nung minprong masütsü. Kiralongrar anema onok rara maneni aotsü aser iba ya shingaia atidaka teblem," ta Tunc-i X sabang ajanga metetdaksü.

Turkey nung opposition lenirtem rongnung tongtibaia kiralongrartemi iba tesem amakba aitsüogo aser iba amala inyakyim anema Turkey-i longjemer raratsü, ta ashi.

Ankara, Mongputeni/October 1 (Agencies): Turkey indang interior minister-i ashiba agi, pei temang nung bom alenoker pokdaksür kati Turkey yimtiba nung ministry building jakdang bomb pokdakja police ana yirutsü.

Ali Yerlikaya-i ashiba agi, pei temang nung bomb alenoker pokdaksür anati Ministry of Interior building

maka liasü. Tena rong kati bomb pokdaksü aser tanabuba nisungba ya tepseta liasü, ta minister-i ashi.

Al Jazeera osangbener Sinem Koseoglu-i Istanbul nungi ashiba agi, bomb ya 9:30 ako nung pokdakja liasü.

"Parliament aser Interior Ministry building telung aser temeket nung security akangshiogo.

UN mission ka Nagorno-Karabakh tongogo

Baku, Mongputeni/Oct. 1 (Agencies): Baku-i Nagorno-Karabakh atsüngba sülen Armenia nungertem timba jena orr aliba mapang ka nung United Nations mission ka Nagorno-Karabakh Deobarnü tonga aruogo, ta Azerbaijan-i ashi.

Azerbaijan tir otongdar kati ashiba agi, UN mission ka Karabakh Deobar anepdang tongogo. Parnok ya tongtibangsa humanitarian tenüngdakba balala asoshi teyari agütsütsü atema aruba lir.

Küm 30 shi nung tang mezüngbuba international lokti tentet ka nem iba tesem semdangtsü asoshi temelaba agütsüogo.

Armenia nung separatists tem shirnoki küm semer shi iba tesem aziüoka liasü, parnok prangbong hadir tokja parnok indang sorkar loksatsü mulunga agiziük aser iba tesem Azerbaijan nung maneni densemogo.

Taoba hopta Azerbaijan-i iba tesem amakba sülen Karabakh nung nütsünyongsük 120,000 aliba nungi ajunga amai iba tesem toktsür ao aser iba ajanga refugee teblemetsü ka tenzükdakja liasü.

Deobarnü Armenia ajunga nung iba tesem atema sarasadem anogo ka ayongzüka mungogo. Linük ajunga nung tekülemdak balala nung tsüngtsüng atemba den Armenian Apostolic Church tekolakba Karekin II lenisüba nung linük indang cathedral tongtiba Echmiadzin nung tekülem agia liasü.

Kasa mapang nung kin ka samtsütsü merangba atema Yerevan-i Baku aitsüogo, koba Baku-i magizüki arudar. Azerbaijan-i Armenia nung dang parnok talidak toktsür maotsü ashiba den parnok temeden akümtsübuttsü ta shiogo.

Armenia kong nütsünyongsük million 2.8 lir iba linük nung refugee tem ajungbena senokba ajanga talidak anepalutsütsü asoshi teblemetsü adokogo.

Ketdangsürtemi ashiba agi, nisung 35,000 khen atema anepaklutsüba kitem nung jenoka lir.

International Federation of Red Cross aser Red Crescent Societies-i Hokolbarnü Nagorno-Karabakh nungi jena aoertem nem teyari agütsütsü asoshi Swiss Francs million 20 agütsütsü mepeshia metetdaksüogo.

Nagorno-Karabakh region nungi nisung 100,000 dak tema jena ogo, ta Armenia-i ashir. Tetetzü taoba hopta Azerbaijan-i iba region amak tenzükba sülen ethnic Armenia nung ajunga aoba amai adoker.

Azerbaijan-i iba tesem ya tanaben lungjemdaksüner aser yangji alirtem kasa amshitsü ta ashir saka Armenian odongtar kati ibai tiazü o lir, ta ashir.

Azerbaijan indang shilem ka ama züngshiba Nagorno-Karabakh ya küm 30 dak tema ethnic Armenians temi amokbanger arua liasü.

Azerbaijan indang sepaitemi iba tesem lungbanger amakdang ethnic Armenian nung 200 aser Azerbaijan sepa ter dak tema süogo. Ceasefire nung shilem ka ama separatists temi parnok indang nok-nü bendanga agütsütsü ashi.

Pei sasa sangdongba Republic of Nagorno-Karabakh indang leniri ashiba agi, parnok ya kümsen tashinung samatsü.

Armenia ato kilonser indang odongtar Nazeli Baghdasaryan-i ashiba agi, taoba hopta linüki aiter refugee tem 100,417 jungogo aser itemji Nagorno-Karabakh nütsünyongsük 120,000 aliba nungi lir.



**CHIEF MINISTER
NAGALAND
KOHIMA**

1st October 2023

MESSAGE


The National Wildlife Week is being observed all over the country in the first week of October every year to create awareness about the urgency and importance of wildlife conservation. In the good old days, wildlife was seen as one of the food items, and a delicacy too. Even the most advanced West considered it as a sport, to be killed for pleasure, and displayed as trophies. However, there has been increasing realisation of the importance of wildlife for ecological balance, for our food production, and for our very survival and existence on earth. The hard fact may be put this way: wildlife can exist and thrive without human beings, but the entire existence of human beings will be put in an extremely precarious situation without wildlife. Therefore, wildlife protection and conservation has become the burning need of the hour, and the duty of everyone of us.

Nagaland is endowed with a rich wildlife and bio-diversity. However, without realising their true value, we have destroyed a large part of this natural wealth. Thankfully, there has been an increasing realisation and awakening amongst the Nagas too, about the importance of wildlife, and the need to protect and conserve them; and things are taking a new turn for good. Some of the note worthy initiatives include establishment of Community Reserves, banning of hunting within their respective jurisdiction by village authorities, and successful awareness and motivational drives undertaken by NGOs and activists on wildlife conservation. Our success story in protecting the migratory Amur falcons is well known to the whole world now.

The WildlifeWeek is an opportunity for us to reflect on our responsibilities towards our planet and all its inhabitants, including ourselves and the future generations. It is the duty of everyone of us to do whatever we can to support wildlife conservation initiatives, to reduce our own carbon footprints that will help in reducing global warming and climate change.

During this National Wildlife Week, let us pledge to work towards a future where all creatures can live and thrive together in harmonious co-existence.

(Signature)
01/10
(NEIPHIU RIO)



CHRISTIAN HIGHER SECONDARY SCHOOL

NYAMO LOTH ROAD, DIMAPUR 797112, NAGALAND

E-mail: christian.dimapur@gmail.com / Website: www.chssdimapur.com


Motto : **IN LOVE AND TRUTH WE STRIVE**

WE DESIGN YOUR CHILD'S FUTURE: WE BUILD YOUR CHILD'S CAREER

ADMISSION FORMS

for 2024 session (Classes A-7)

available during office hours (9 am to 1 pm)



Limited Seats

SPECIAL FEATURES

- ☞ Smart Board Classrooms
- ☞ Robotic Lab (ATL)
- ☞ Scripture Retreat & Counselling
- ☞ Career Guidance Cell
- ☞ Summer Bible School
- ☞ Hostel for Boys
- ☞ NCC
- ☞ Scouts and Guides
- ☞ Club Activities
- ☞ Bus Service

National Tug Of War c'ship nung Nagaland team-i silver angu



Kohima, Mongputeni/October 1 (TYO): Nagaland Tug of War Association (NTWA) tang mezüngbuba national Tug of War Championship (36 Senior Men & Mixed and 18 Senior Federation Cup National Tug of War Championship 2023) nung shilem agia liasü.

Iba asayamung ya Arunachal Pradesh kübok Tawang jila nung ayongzüka asaya aser Deobarnü Nagaland team-i 580 Kg Men & Mixed category

Final nung Nagaland team-i Kerala mekoki liasü. Silver Medal anguba atema kanga pelaba lemsatepba mapang NTWA tir Dr. Vekho Swuro-i ashiba agi, asayartem, ketdangsurtem, well wisher tem aser Nagaland nung aliba nüburtemi sarasadem aser tanga lenla balala nung nongita yariba ajanga iba takok ya ngutetogo.

Iba amala asayamung ka nung tangang mezüngbuba

shilem agir asünung lenla aika nung technique majungba ngutetogo aser taruba asayamungtem nung gold medal ngutettsü atema training aika agitsü nungdaker, ta paisa ashi.

Nagaland contingent nung asayar 22 (tebur 17 aser tetsür 5) ketdangsur 4 aser gari anir ana densema liasü.

Nagaland team October 2 nü Dimapur-i apusoa arutsü aser October 3 nü nikongtsütsü atongtsü imlar.

Veronika Kudermetova-i Pan Pacific Open kokogo

Mongputeni/October 1, 2023 (Agencies): Deobarnü Tokyo nung Pan Pacific Open final nung eighth-seeded asayar Veronika Kudermetova-i world number four asayar Jessica Pegula koka taküm mezüngbuba asayamung kokogo. Lai tang agi tanabenbuba WTA asayamung ka kokogo.

Kudermetova-i asaya tetenzük nungi la indang aggressive style sayua asaya aser lai baseline nung shot tajung aika asaya liasü.

Mezüngbuba set nung lai Pegula indang serve ka break süa la 3-0 agi tejakdang aküm, ajisüaka Pegula-ia game pongububa nung Kudermetova indang serve ka break süa kasasa aküm.

Mezüngbuba set nung kanga dang tongtibang mapang ka nung Pegula-i double fault ka menaba sülen Kudermetova

nem asaya akoktsü asoshi maongka agüja liasü. Russia tsür shiba WTA ranking nung jenjang 19buba nung lir, lai tanabuba set nunga kanga junga asaya aser 5-1 agi la tejakdang aküm aser serve tesashi ka oa tanabuba set ayong ayonga koka liasü.

Iba asaya akokba densema Kudermetova-i taküm tang agi tanabenbuba Pegula kokogo. Lai Madrid Open quarter-finals nunga Pegula koka liasü. Temetettsü kaji top-10 nung aliba asayartem den tesüsabuba trokben asayaba mapang lai asaya pongubo kokogo. Iba asayamung nung Kudermetova-i world number two asayar Iga Swiatek-a koka liasü.

Tokyo nung kanga junga asayatetba sülen Kudermetova-i la sempet sayuogo aser tarutsü nung lai kanga junga asayatsü imlar.

NSF Trophy: Liangmai FC aser Asiifii FC na QFs-i iogo



Kohima, Mongputeni/October 1 (TYO): Angami Students' Union (ASU)-i ayongzüka Indira Gandhi Stadium, Kohima nung tanga asaya aliba 23buba NSF Martyrs' NSF Trophy nung Honibarnü Liangmai Football Club aser Asiifii Football Academy nati pei tata asaya koka quarterfinals-i iogo.

Honibarnü mezüngbuba asaya nung Liangmai FC-i goal 7-2 agi Teima Khe Kidima koka liasü.

Asaya nung Kawitibo-i (17) minute anabuba nung Liangmai FC atema mezüngbuba goal idaktsü aser paisa minute 8 aser 11buba nung goal ana idakja liasü. Iba sülen Ningtingbo-ia (11) par team atema minute 30buba nung goal ka idaktsü.

Teima Khe nungi asayar Nosal Pucho (7) aser Tepevil Thokhwe (8) natia minute 36 aser asaya mezüngbuba shilem nung mapang apuloktsür asayaba mapang goal ana idaktsü, ajisüaka asaya tanabuba shilem nung Teima Khe nungi asayar Sweyiesal-i (14) own goal ka idaktsü aser Liangmai FC nungi asayar Kenumdi-i minute 70 aser 72buba nung goal ana idakja liasü. Iba asaya asoshi Man of the match naroküm Liangmai FC nungi asayar Kawitibo (17) nem asayamung Technical Committee

Convener P George Vizo-i agüja liasü.

Honibarnü asaya tanabuba nung Asiifii Football Academy Academy-i goal 3-2 agi Medziphema Royal FC koka liasü.

Asaya nung Kikruzeliu Kuotsu (9) aser Mangal Gurung (13) nati Medziphema Royal FC atema minute 21 aser 23buba nung goal kaka idaktsü.

Ajisüaka Asiifü atema Lamgumlal Kipgen-i (14) minute 36buba nung goal ka aser Lamgumlal Kipgen-i (14) asaya mezüngbuba shilem nung mapang apuloktsür asayaba mapang goal ka idakja goal kasasa aküm.

Asaya tanabuba shilem nung telok kati danga goal magütsüteni kanga toktepa asaya arur Asiifii nungi asayar Eloziüo Kayina-i (9) mapang apuloktsür asayaba mapang par team asoshi goal ka idakja parnoki asaya koka liasü. Asaya nung NSF tir Medovi Rhi-i Eloziüo Kayina nem man of the match naroküm agüja liasü.

October 2 nü asaya:

- 1. United FC Piphema vs Nagaland University Kohima Campus @ 11:30 am
- 2. Football for Change Academy vs Jakhama Youth Organisation @ 1:30 PM.

Asian Games nung India nunger asayartemi takok tajung angu



Deobarnü Maneni Avinash Sable-i 3000m steeplechase nung gold medal anguba sülen tangokba noksa nung angur. Pa ya India nunger rongnungi iba asaya nung gold medal anguba mezüngbuba asayar kümogo.

Mongputeni/October 1, 2023 (Agenies): Deobarnü Asian Games, trap shooting nung India nunger asayar Prithviraj Tondaiman, Kynan Chennai, aser Zoravar Singh Sandhu nungeri gold medal nguogo.

Tebur team-i gold medal magu tsüngda tetsür team nung Manisha Keer, Preeti Rajak aser Rajeshwari Kumari nungeria tetsür trap team event nung silver medal ngua liasü.

India tebur team-i qualifications nung point 361 ngua silver medal anguba team nung Khaled Almudhaf, Talal Alrashidi aser Abdulrahman Alfaihan (359)

nunger aser bronz medal anguba China team ajateta liasü.

Tetsür team-ia point 337 ngua silver medal angu. Iba asaya China (357) team-i koka liasü.

Deobarnü ano Harmilan Bains-i tetsür 1500m race nung silver medal ka nguogo.

Bains shiba Punjab nungi lir lai alizüng 4:12.74 nung tongteta Bahrain tsür Winfred Mutile Yavi (4:11:65s) sülen tanabuba jenjang nung tembanga silver medal ngua liasü.

Kasa asayamung tebur Shot Put asaya nung Tajinder Pal Singh Toor-i gold medal nguogo. Toor-i tatembangbuba

merangdanga mapang meter 20.36 tongteta takok tajung ngua liasü.

Iba asaya nung Saudi Arabia nunger asayar Mohamed Daouda Tolo-i silver aser China nunger asayar Yang Liu-i bronze medal ngua liasü.

Maneni Avinash Sable-i 3000m steeplechase nung gold medal ngua, pa ya India nunger rongnungi iba asaya nung gold medal anguba mezüngbuba asayar aküm. Pai 8:19.50 seconds nung alizüng tongteta India asoshi athletics nung mezüngbuba medal ngua liasü.

Deobarnü India nunger athletes temi maneni kanga junga asaya Long jumper Murali Sreeshankar-ia silver medal ka nguogo. Pai 8.19 meters jokteta silver ngua liasü.

Ano tetsür 100m hurdle nung Jyothi Yarraji-i 12.91 nung alizüng tongteta bronze medal nguogo. Iba asaya nung China tsür Yuwei Lin aser Yanni WU nati gold aser silver ngua liasü.

Kasa mapang nung tetsür heptathlon 800m nung Nandini Agasara-i bronze medal nguogo aser Discuss thrower Seema Punia-ia tetsür discus throw nung bronze medal nguogo.

BILEMDANGANG

"Temeim sayudi süra kecha tatidakba makai sayuang."